

治
河
全
書

治河全書

卷之十七

章奏

首請三事

請帶人員

脩高郵護城堤

盡拆塌黃壩

開清口引河

濬芒稻等河

堵塞邵伯更樓

報勘河情形

脩高堰臨湖埽工

應脩工程

兵部尚書兼都察院右都御史總督河道提督軍務臣張鵬翮謹
奏為請

旨事康熙三十九年三月初九日大學士伊桑阿等傳

上諭河工錢糧甚屬紊亂于成龍見經病故江南江西總督張
鵬翮操守好著調補河道總督爾等即傳旨與張鵬翮欽此
竊臣一介庸愚荷蒙

皇上高厚之恩鞠躬盡瘁固臣素心但河工關係

國計民生甚為重大臣才識短淺未諳河務誠恐有負任使
伏乞

皇上另簡才堪治河之人庶幾蚤奏平成等因轉

奏未蒙

俞允臣思河道至今日潰壞已極恐涉畏難就易之嫌不敢再
行瀆請我

皇上軫念河工宵旰屢懷自有

聖謨方畧指示微臣奉以遵行但臣一得之愚不揣冒昧上陳
天聽一總河之責任宜專也從來定制祇設總河一員督管河
道廳官專心致志相機脩築故歷有成效自靳輔于成龍
為總河時始帶府尹徐廷璽名曰副總河事權不一議論

參差不疏下流今黃口塞矣不脩時家馬頭今河流旁決
矣不疏清口而黃水倒灌矣不築高堰不塞唐埂六壩而
淮水東下邵伯高寶一帶堤岸潰決矣河壞已極糧艘難
進糜費

帑金無算毫無著落是徐廷璽在河工多年不曉河務明矣
徐廷璽之不能清理錢糧抑又明矣豈可姑留河工令再
貽誤伏乞

皇上乾斷將徐廷璽撤回別用如謂需人助理則見在之管河
道廳等官皆堪量材指使者也一河工隨帶之人員宜撤

也于成龍隨帶人員甚多在成龍初意原欲衆擎易舉協力相助詎意一到河工花費

國帑鑽刺題官河工之壞亦由於此前經科臣汪煜條奏奉

旨撤回成龍又以經手工程未完錢糧未清為辭殊不知工程淹沒從何稽覈錢糧耗用從何究追皆由瞻徇情面以致迄於無成應請

勅該部仍遵前

旨盡數撤回將未清錢糧交部照追可也一部臣之不宜掣肘

也河工者司空之事河工成則司空之職舉是工部與河
臣事關一體理宜同心共濟以期底績乃部臣每事掣肘
估脩奏銷任意混駁種種弊端難逃

皇上洞鑒之中伏乞

皇上勅諭部臣寬其文法責以成功庶精神得以專一而河務
不致旁撓矣以上三條臣雖在工言工但據理直言必觸
人忌臣受

皇上特達之知超擢至此惟期河工蚤成仰副

皇上堯咨舜警之意臣雖受怨招謗亦所不恤也為此具奏謹

奏請

旨本月十四日奉

旨該部議奏欽此欽遵該臣等議得河道總督張鵬翮奏稱一
總河之責任宜專也從來定制祇設總河一員督管河道
廳官專心致志相機脩築故歷有成效自靳輔于成龍為
總河時始帶府尹徐廷璽名曰副總河事權不一議論參
差不疏通下流今黃口塞矣不脩時家馬頭今河流旁決
矣不疏通清口而黃水倒灌矣不築高堰不塞唐埂六壩而
淮水東下糧艘難進糜費帑金無算毫無著落是徐廷璽

在河工多年不曉河務明矣徐廷璽之不能清理錢糧抑
又明矣豈可姑容河工令再貽誤將徐廷璽撤回別用如
謂需人助理則見在之管河道廳等官皆堪量材指使等
語查府尹徐廷璽係原任總河于成龍題請帶去協理河
務之員今該督既稱將徐廷璽撤回別用等語應令徐廷
璽將伊任內錢糧事件交代明白回京又疏稱于成龍隨
帶人員甚多一到河工花費

國帑鑽刺題官河工之壞亦由於此前經科臣汪煜條奏奉
旨撤回成龍又以經手工程未完錢糧未清為辭殊不知工程

淹沒從何稽覈錢糧耗用從何究追仍遵前

旨盡數撤回將未清錢糧交部照追等語查先經原任總河于成龍疏稱效力旗員凡有經手工程已經報竣者見在行令回旗外惟是委築各案大工并脩砌石工一時難以驟完應俟告竣清楚之日令其回旗等因在案應俟新任總河張鵬翮到任將各員所管工程有無完竣錢糧有無清楚之處親身逐一查明即令發回又疏稱部臣每事掣肘估脩奏銷任意混馭種種弊端難逃

皇上洞鑒之中伏乞

皇上勅諭部臣寬其文法責以成功庶精神得以專一而河務不致旁撓矣等語查河務關係錢糧凡估脩奏銷之事與例相符者具題准脩准銷與例不符者具題駁查今若將不應行查之事行查不應駁回之事駁回每事掣肘及估脩奏銷任意混駁種種弊端該督具題到日將本內有名堂司官員交與該部嚴加議處可也康熙三十九年三月十五日題本月十七日奉

旨依議

兵部尚書兼都察院右都御史總督河道提督軍務臣張鵬翮謹
奏為請

旨事臣恭聞

天語河工花費錢糧因你做官不要錢可以清理欽此臣思兩
江總督惟潔已率屬有守足矣若夫河道潰壞之際總河
之臣貴乎有守而尤貴乎有才然河臣有守必須屬員人
人有守而後錢糧皆歸實用可杜冒破之弊河臣愧非長
才必得有才之人同心協力贊勸河務庶幾可奏底績之
效謹就臣素所深知之人臚列姓名上達

天聽見任陝西甘山道王謙才守超卓堪任河務請將王謙補授淮揚道則其守可以清理錢糧其才可以贊理河務原任陝西咸寧縣知縣陳明經居官廉潔百姓愛戴原任四川潼川知州劉可聘前任浙江泰順知縣係臣屬員臣見其操守謹飭才幹優長兩人俱因公革職廢棄可惜請取用河工以勵後效原任江蘇按察司趙世顯見任刑部員外丁場見任徐州知州孔毓珣此三員俱臣江南屬員才守兼優辦事勤敏見任工部郎中王廷楫見任浙江湖州府同知趙泰姓此二員俱臣浙江屬員操守謹飭才能辦

事見任禮部員外蔣陳錫前任富平知縣士民稱其有守
有才臣奉差陝西審事親聞最確候補守備紀之慧前任
江西守備不扣兵餉則有守整飭營伍則有才曾經軍政
卓異以上人員祈

皇上准臣帶往河工效力其見任者仍照原銜食俸遇有相當
員缺另疏題補以收臂指之用臣從仰體

皇上軫念國計民生務求有益河工起見絕無情面私心伏乞
皇上俞允施行等因本日奉

旨此等人員俱依議帶去

兵部尚書兼都察院右都御史總督河道提督軍務臣張鵬翮謹
題為

題明事臣遵

旨看視江南河工於四月初九日抵高郵州看得沿城堤岸單
薄殘缺護堤排椿埽工共長一千六百五十丈前河臣于
成龍等派候補主事王鼎等領帑銀承修迄今並不堅固
修理沿湖堤岸去夏淹沒水漫運河一望汪洋止存沿城
一線土堤又屬單薄誠恐伏汛水漲捍禦無資城池民生
關係非小若仍責承修之人修理帑銀花費緩不濟事應

照往例即發錢糧委該管署事廳官李世彥同該州知州
謝廷瑞剋期修理完固以禦伏秋之水以保城池運道民
生其王鼎等所領帑銀查明數目交該部移咨該管官照
追完項可也茲高堰之水盡行東下高寶二湖水難容蓄
堤工甚屬危險臣目擊心憂工程實屬緊要故首先

題請興修抑臣更有請者河工潰壞已極間有所存堤岸俱
屬不堪危險工程亟宜及時的修甚多若俟具

題部議發帑始行動工耽延時日勢必遲誤自今緊要工程

容臣一面

題明一面動正項錢糧修理庶克有濟臣從仰體

皇上軫念國計民生至意起見伏乞

睿鑒勅部速議施行等因康熙三十九年四月初十日題本月

二十六日奉

旨九卿詹事科道會同速議具奏欽此欽遵於四月二十七日
抄出到部該臣等會議得河道總督張鵬翮疏稱臣看視
江南河工惟高郵州首沿城單薄殘缺護堤排椿埽工共
一千六百五十丈前河臣于成龍等派候補主事王鼎等
領帑承修迄今並不堅固修理臨湖堤岸去夏淹沒水漫

運河一望汪洋止存沿城一線土堤恐伏汎水漲捍禦無
資城池民生關係非小若仍責承脩之人修理帑銀花費
緩不濟事應照往例卽發錢糧委該管廳官李世彥等尅
期修理完固其王鼎等所領帑銀查明數目交該部移咨
該管官照追完項等語應將高郵單簿殘缺堤岸并護堤
排椿照該督所題卽發錢糧委員修理其王鼎等所領帑
銀係總河發給本人冊籍俱在彼處不便由部轉行追取
應令該督查明數目勒追還項仍將王鼎等職名開列題
叅到日交與該部嚴加議處又疏稱河工潰壞已極間有

所存堤岸俱屬不堪危險工程亟宜及時的修甚多若俟部議發帑動工勢必遲誤自今緊要工程容臣一面題明一面動正項錢糧修理等語亦應如該督所題將緊要工程一面題明一面動帑修理可也康熙三十九年五月初一日題本日奉

旨依議速行欽此欽遵移咨到臣准此當即檄行護淮揚道同知馬驥督同署揚河通判事李世彥等將高郵州殘缺護堤排椿先行確估造冊尅期修理完固將候補主事王鼎等所領帑銀查明數目勒追還項并將王鼎等職名開列

詳叅去後今據淮揚道叅議王謙將做過工程造冊請銷
應繳銀兩查明詳報照追解還清項等因到臣據此該臣
看得高郵護城排埭埽工保護城池運道民生關係最為
緊要前任河臣于成龍等委令主事王鼎等領帑簽釘不
堅殘壞不堪難資捍禦經臣具疏

題明委李世彥等領帑修理九卿會議應如所題具王鼎等
所領帑銀查明數目勒追還項仍將王鼎等職名開列

題叅奉

旨依議速行欽遵轉行在案今據淮揚道叅議王謙詳稱護城

堤工原長一千六百五十丈估銀四千八百一兩五錢內
除花色工內有原樁未動之處不用重修外今實做過工
長一千六百二十五丈五尺用過工料銀四千二百五十
七兩一錢九分二釐五毫節省銀五百四十四兩三錢七
釐五毫查王鼎等應繳銀七千九百七十六兩九錢一分
零內除刑部員外郎王弘烈已繳完銀一千二百八十一
兩四錢七分零免叅外其候補主事王鼎江南泰州人應
追銀一百五十兩鑲藍旗叅領劉顯位應追銀一千一百
一十二兩四錢鑲藍旗公裔額駙馬雲肅應追銀二千兩

鑲藍旗固山大馬世勳應追銀二千八百四十九兩一錢
候選經歷趙啟誠江南山陽縣人應追銀三百兩監生平
士楠浙江山陰縣人應追銀一百五十兩千總張奇捷山
陽縣人俊秀花色鑲白旗人共應追銀一百三十三兩九
錢四分零以上共應追銀六千六百九十五兩四錢四分
零相應開列詳叅係漢人行該省巡撫係旗人行該旗都
統於各員名下照追還項等因前來除原冊送部查覈外

臣謹恭疏具

題伏乞

皇上勅部議覆覈銷施行等因康熙四十年正月二十二日題

二月初九日奉

旨著察覈該部知道欽此欽遵於二月初十日抄出到部該臣等會議得河道總督張鵬翮疏稱高郵護城堤排椿埽工前河臣于成龍等委令主事王鼎等領帑簽釘不堅殘壞不堪難資捍禦經臣具疏題明委李世彥等領帑修理其王鼎等所領帑銀勒追還項今護城堤做過工長一千六百二十五丈五尺用銀四千二百五十七兩一錢零王鼎等應繳銀七千九百七十六兩九錢除王弘烈已繳銀一

千二百八十一兩四錢零其王鼎劉顯位馬雲翥馬世勳
趙啟誠平士楠張奇捷花色共應追銀六千六百九十五
兩四錢零於各員名下照追還項等因前來查定例內河
流不移者將管河各官俱革職戴罪勒限半年賠修應賠
銀兩亦照賠修之例勒限處分等語應將候補主事王鼎
候選經歷趙啟誠監生平士楠俊秀花色鑲藍旗叅領劉
顯位固山大馬世勳額駙馬雲翥千總張奇捷均照例革
職帶罪勒限半年賠完如限滿不完照例題叅其修理高
郵護城堤用過銀四千二百五十七兩一錢零准其開銷

再查王鼎趙啟誠張奇捷係江南人平士楠係浙江人劉
顯位馬雲翥馬世勳係鑲藍旗人花色係鑲白旗人應行
該旗都統各省巡撫速行照例追取還項可也康熙四十
年三月初十日題本月十二日奉

旨依議

兵部尚書兼都察院右都御史總督河道提督軍務臣張鵬題
題為

題明盡拆攔黃壩以疏海口事臣維導河入海順水之性古
人治河之道也自原任河臣董安國等創築攔黃壩拂水
之性以致黃水倒灌清口淤塞下流不通上流潰決淮揚
常受水患勞費罔效以迄於今臣仰體

皇上軫念國計民生至意履任之後即親勘河工於四月十八
日過雲梯關到攔黃壩看得攔黃壩巍然如山中間一線
涓涓細流下流不暢無怪乎上流之潰決也臣率領廳縣

各官於欄黃壩上流相度正黃河水面寬八十三丈餘則
欄黃壩亦應照此丈尺拆挑一律寬深方足宣洩今查前
河臣于成龍上年委郎中朱成格止拆壩一十七丈見今
水出其中續經署總河印務臣徐廷璽委同知佟世祿等
又拆壩二十八丈七尺估挑引河亦未挑成尚有欄黃壩
並積土三十七丈三尺未拆且壩基高昂終屬壅滯盡行
拆去挑挖深通與正黃河八十三丈之水而相符亟堵馬
家港於月內合龍使水勢不致旁洩盡由正河而行俟黃
水大長時將新挑之河始行開放資其暢流之勢衝刷淤

墊直達海口臣恐海口或有淤沙之處每行一百一十五
里至二十日至八灘之地今日海口一壑東海汪洋無際
此壩開拆深道則黃水入海自是暢達其開高堰疏清口
於秋後水落可以次第舉行因關緊要工程趨伏秋未發
急於興工臣一面動帑委原任知州劉可聘候選州同劉
于沂督催承修官馮大奇王鎮王廷翰姜逢彩賈弘獻邵
允貴劉長璉張其祉等作速備工拆挑勒限完竣其所用
錢糧數實估計另疏

題報謹將拆壩挑河動帑情由合先

題明伏乞

皇上睿鑒勅部速議施行等因康熙三十九年四月二十一日
題五月初八日奉

旨九卿詹事科道會同速議具奏欽此欽遵於五月初八日抄
出到部該臣等會議得河道總督張鵬翮疏稱臣於四月
十八日過雲梯關看攔黃壩巍然如山中間一線涓涓細
流下流不暢無怪乎上流之潰決也於攔黃壩上流相度
正黃河水面寬八十三丈餘則攔黃壩亦應照此文尺拆
挑一律寬深方足宣洩查前河臣于成龍拆壩一十七丈

見今出水其中績經徐廷璽又拆壩二十八丈七尺尚有
三十七丈七尺未拆應盡行拆去挑挖深通與正黃河八
十三丈之水面相符亟堵馬家港於月內合龍使水勢不
致旁洩盡由正河而行俟黃水大長時將新挑之河始行
開放資其暢流之勢衝刷淤墊則黃水出海自是暢達其
閉高堰疏清口於秋後水落可以次第舉行因關係要工
程急於興工一面動帑委原任知州劉可聘等作速備工
拆挑勒限完竣其所用錢糧覈實估計另疏題報等因前
來查該督既稱拆去攔黃壩挑挖與黃河水面相符使水

勢不致旁洩資其衝刷淤墊等語應如所題速行拆挑可也康熙三十九年五月初十日題本日奉

旨依議速行欽此欽遵移咨到臣准此隨行該道轉催拆挑完工造冊報銷去後今據淮揚道叅議王謙造冊詳銷等因到臣據此該臣看得安東攔黃壩前河臣于成龍等俱未全拆臣於四月十八日親往查勘見壩土巍然如山中間一線細流下流不暢上源恐其壅滯當發帑銀二千兩委令原任知州今補安清中河通判劉可聘候選州同劉于沂督催承修官馮大奇巡檢王鎮王廷翰守備姜逢彩把

總賈弘獻邵允貴劉長璉張其祉等分段拆挑將壩基積
土埽柴盡行拆去挑濬深通暢流入海前於恭報海口疏
通疏內

題明在案飭令將用過錢糧照例造冊報銷去後今據該道
送到銷冊僅用銀一千九十三兩一錢四釐八毫餘銀九
百六兩八錢九分五釐二毫照數繳還收庫詳請

題銷前來查該員籌費帑少而成功速具見實心辦事雖胼
胝盡職固屬分所宜然而勞動難泯應請議叙以示鼓勵
除用過錢糧原冊送部查覈外理合具疏

題銷伏乞

皇上睿鑒勅部覈銷議叙施行等因康熙三十九年十二月初八日題四十年正月二十日奉

旨著察覈該部知道欽此欽遵於正月二十一日抄出到部該臣等議得先經河道總督張鵬翮將攔黃壩尚有二十七丈三尺未拆應盡行拆去挑挖深通等因具題經臣部覆准在案今據該督疏通安東攔黃壩因未盡拆撥帑二千兩委令安清中河道判劉可聘等分段拆挑將壩基積土埽柴盡行拆去挑濬深通用銀一千九十三兩一錢零該

員等費帑少而成功速具見實心辦事勞勩難泯應請議
叙以示鼓勵除用過錢糧原冊送部查覈外理合具疏題
銷等因前來查拆挑欄黃壩銀兩既經該督親勩給發相
應將實用銀一千九十三兩零准其開銷至河員拆壩挑
河係伊專責從無議叙之例應將該督題請劉可聘等議
叙之處毋庸議康熙四十年正月三十日題二月初一日
奉

旨依議

兵部尚書兼都察院右都御史總督河道提督軍務臣張鵬翔謹
題為請

旨先挑清口引河以濟運道事臣仰體

皇上軫念國計民生至意履任後徧歷河工逐一查勘應修濬
之處分別緩急次第入

告惟是清口為淮黃交會之處目今糧艘北上最為緊要今河
身淤墊竟成平陸清水隔絕不通獨有黃水流入運河深
不過三尺五寸四尺不等與去歲所見大不相同茲部臣
常綬等議築欄黃壩糧艘過盡竟行堵塞使黃水不入運

河再將裴家場三處引河開濬廣濶深通引清水入運河
是亦權宜之計臣親到此地相度形勢博採輿論僉謂黃
河比裴家場引河身高爛泥淺係流沙旋挑旋淤裴家場
與帥家莊相連不遠即開濬深通當夏秋黃水大長力強
之時引河清水終虞力弱不能相敵應於張福口挑引河
一道身長一千五十丈面寬十丈深一丈餘或八九尺不
等引清水於黃河口相近處入運河勢在裴家場引河之
上上下下水勢相濟當夏秋水長之時兩處清水匯合庶可
敵黃蓋因清口淤塞之處甚為廣濶非多挑引河鮮克有

濟比之引湖水入江既有金灣三閘之河又有鳳凰橋雙
橋灣頭等四處之河引入人字河芒稻河水勢得以暢流
入江此成法之有效者也故宜開張福口引河以導清水
使之暢達建閘一座以司啟閉所需工價將江浙學臣張
榕端張希良捐助銀兩動用工完造冊報銷若俟具

題部覆後方始興工恐伏汎水發緩不濟事趨今水勢未長
正可兼工挑濬除一面飭令該管同知常維禎并通判胡
琪原任僉事道程兆麟等作速倍工挑濬外臣謹具

題伏乞

皇上睿鑒勅部速議施行等因康熙三十九年四月二十一日
題五月初八日奉

旨九卿詹事科道會同速議具奏欽此欽遵於五月初八日抄
出到部該臣等會議得河道總督張鵬翮疏稱清口為淮
黃交匯之處日今糧艘北上最為緊要今河身淤墊竟成
平陸獨有黃水流入運河與去歲所見大不相同臣相度
形勢博採輿論僉謂黃河比裴家場引河身高爛泥淺係
流沙裴家場與帥家莊相連不遠即開濬深通當黃水大
長力強之時清水終虞不能相敵應於張福口挑引河一

道身長一千五十丈面寬十丈深一丈餘或八九尺不等
引清水於黃河口相近處入運河底可敵黃故宜開張福
口引河建閘以司啟閉將江浙學臣張榕端張希良捐助
銀兩動用赴今水勢未長飭令同知常維禎等作速倍工
挑濬等因前來既經該督親身詳勘具題應均如所題作
速挑濬可也康熙三十九年五月初十日題本日奉

旨依議速行欽此欽遵移咨到臣准此隨經檄行護淮揚道同
知馬驥估計去後今據淮揚道叅議王謙造冊詳估俯賜
覈

題等因到臣據此該臣看得張福口挑引河一道引清水入
運經臣具

題九卿等議覆應如所題作速挑濬等因奉

旨依議速行欽遵在案臣即委令候補僉事道程兆麟通判胡
琪等一面倍工備挑引河一面將挑河土方並建築草壩
石閘工料銀兩據實確估去後隨據程兆麟等詳稱於挑
張福口引河一千五十丈之外又挑河一百八十五丈緊
接二港湖水處方能引水暢流其河頭舊堤有水口四處
共長四十七丈必須堵塞方不使湖水散漫盡歸引河

尾先築草壩方可束水濟運臣親往看閱相度籌畫接挑引河堵塞水口築草壩之處悉應如議但所估錢糧恐其稍有浮冒再四批駁今據淮揚道叅議王謙詳稱逐款確覈委無浮冒分別造冊挑河並築草壩估計土方工料銀一萬一千七百五十四兩八分六釐其石閘緩建俟堵閉六壩逼清水出口審度形勢另行具

題等因冊詳前來臣覆確覈無異其需用銀兩於學院張榕端張希良所捐銀一萬一千兩支用又於淮關分司馬爾漢所捐銀內支用銀七百五十四兩零並不動用大工錢

糧除原冊送部查覈外相應具疏

題估伏乞

皇上睿鑒勅部議覆施行等因康熙三十九年八月二十八日

題九月十七日奉

旨該部議奏欽此欽遵於九月十八日抄出到部該臣等議得

先經河道總督張鵬翮將張福口應挑引河一道長一千

五十丈引清水入運等因具題經九卿會議覆准在案今

據該督疏稱張福口挑河并築草壩共估土方工料銀一

萬一千七百五十四兩零於張榕端張希良馬爾漢所捐

銀兩支用不動大工錢糧等因前來查張福口引河先經該督題報挑成開放在案今該督既經估計具題應令該督將用過錢糧覈減造冊題銷可也康熙三十九年十月

初二日題本月初五日奉

旨依議欽此欽遵移咨到臣准此當即檄行該道廳覈減造冊詳銷去後今據淮揚道叅議王謙造冊詳請覈銷等因到臣據此該臣看得張福口引河動用張榕端等所捐銀兩委候補道程兆麟等挑挖完工開放俱經

題明續將需用土方工料銀兩照例估計部議覈減造冊報

銷奉

旨依議欽遵在案今行據淮揚道叅議王謙詳稱張福口挑河
并築草壩原估土方工料銀一萬一千七百五十四兩零
八分六釐實用銀一萬八百五十九兩八分六釐節省銀
八百九十五兩解交河庫造冊詳銷前來臣覆覈無異並
無浮冒所挑引河清水暢流淮黃交會永修官候補道程
兆麟通判胡琪等實心任事勞績難泯俟再挑清口引河
完工一併

題請議叙除原冊送部查覈外相應

奏銷伏乞

皇上勅部覈銷施行等因康熙三十九年十二月初十日題四
十年正月二十三日奉

旨著察覈該部知道欽此欽遵於正月二十四日抄出到部該
臣等議得先經河道總督張鵬翮將張福口挑河并築草
壩共需土方工料銀一萬一千七百五十四兩零等因估
計具題臣部覆准在案今據該督疏稱張福口挑河並築
草壩實用銀一萬八百五十九兩零節省銀八百九十五
兩等因前來查前項挑河築壩用過工料價值銀兩與例

相符應准開銷節省銀兩貯庫為河工之用可也康熙四
十年二月初三日題本月初七日奉

旨依議

兵部尚書兼都察院右都御史總督河道提督軍務臣張鵬副謹

題為亟宜挑濬芒稻河以引湖水入江事竊臣恭奉

天語引湖水使之由人字河芒稻河入江朕所見最真你必須
要行欽此欽遵臣逐查勘以至入江之處誠如

聖諭我

皇上明見萬里洞悉河勢

指示周詳仁愛之心無所不用其極臣將所聞形勢繕晰陳之
一人字河之宜挑濬深濶也自金灣閘至孔家渡為河之
腰絡見今狹窄宜開廣濶自此至芒稻山河分兩派又名

芒稻河北處水口兩岸亦狹又有土嶺二處前河臣尚未
完完目今湖水方盈宜洩宜急應多募人夫尅期盡行完
去使其暢流水口下有芒稻閘年久塌壞磯心頗高宜完
深另修因時啟閉以防江湖一鳳凰橋引河之宜再挑也
此河經前河臣新挑因未挑深從橋口至湖家樓河水絕
流竟成平地宜加挑深通引水從王家莊入運鹽河匯入
芒稻河一雙橋灣頭二河之宜挑通也此二河見今水流
同入芒稻河但河底亦有淺處應俟冬時挑濬深通其灣
頭閘座鴈翅塌陷宜及時修砌此三處之水俱相總會入

芒稻河流十八里入江臣觀江口寬濶河底深通兩岸居民二麥成熟不慮水患此江都金灣以下至仙女廟之形勢也惟高郵自橫軍樓起至東西灣止因高堰洪湖之水滔滔東下西堤淹沒浸入運河東堤一望汪洋水由城南大壩而出洶湧泛濫當伏秋水漲恐東堤單薄難以捍禦致有不虞宜將見閉三壩相機酌開以保城池堤岸俟秋盡水落修築堤岸堅固之後再行閉塞除動帑委員外即張弼督催署淮揚道事同知馬驥挑挖人字河芒稻河工程又委同知張琳挑深鳳凰橋引河俱尅期完工外因係

緊要工程挑濬宜急臣一面委官動帑興修一面估計另
疏具

題理合

題明伏乞

皇上睿鑒勅部速議施行等因康熙三十九年四月二十一日

題五月初八日奉

旨九卿詹事科道會同速議具奏欽此欽遵於五月初八日抄
出到部該臣等會議得河道總督張鵬翮疏稱一人字河
之宜挑濬深濶也自金灣閘至孔家渡見今狹窄宜開廣

濶芒稻河兩岸亦狹又有土嶺二處前河臣尚未覓完目
今河水方盛宜洩宜急應多募人夫盡行挖去水口下有
芒稻閘年久塌壞宜挖深另修因時啟閉一鳳凰橋引河
之宜再挑也此河經前河臣新挑因未挑深從橋口至湖
家樓河水絕留竟成平地宜加挑深通引水入運鹽河匯
入芒稻河一雙橋灣頭二河底亦有淺處應俟冬時挑濬
深通其灣頭閘座鴈翅塌陷宜及時修砌惟高郵自橫軍
樓起至東西灣止因高堰洪湖之水滔滔東下西堤淹沒
浸入運河東堤一望汪洋當伏秋水漲恐東堤單薄難以

捍禦宜將見開三壩相機酌開以保城池堤岍因係緊要
工程臣一面委官勸帑興修一面估計另疏具題等因前
來既經該督親身詳勘具題均應如所題可也康熙三十
九年五月初十日題本日奉

旨依議速行欽此欽遵移咨到臣准此隨即檄行護淮揚道同
知馬驥估計在案今據淮揚道叅議王謙詳估到臣據此
該臣看得人字河芒稻河及鳳凰橋引河係引湖水入江
之要道前任河臣于成龍挑挖未成亟應挑挖寬深引湖
水暢流入江經臣具

題九鄉等議覆應如所題等因奉

旨依議速行欽遵在案臣即委令護淮揚道同知馬驥等一面
倍工備挑一面將挑河土方并築壩工料銀兩據實確估
去後今據淮揚道叅議王謙詳稱鳳凰橋起至王家莊止
工長一千四百五十四丈六尺又灣頭入裏王家莊引河
口攔河南壩一道長一十四丈三尺共估挑河築壩土方
工料銀二萬四百六十三兩四錢二釐四毫又芒稻河西
土嶺長八十丈三尺東土嶺長八十九丈又東土山下口
挑斜嘴一段長十丈又金灣閘下自李家渡迤南起由孔

家渡至新橋止長二千二百九十三丈共估土方銀一萬
六千三百三十一兩七錢五分以上通共估用土方銀三
萬六千七百九十五兩一錢五分二釐四毫並無浮冒等
因造冊呈詳前來臣覆確數無異除原冊送部查覈外理
合具

題伏乞

皇上睿鑒勅部議覆施行等因於康熙三十九年十一月十三
日題十二月初四日奉

旨該部議奏欽此欽遵於十二月初五日抄出到部該臣等議

得河道總督張鵬翮疏稱鳳凰橋至裏河王家莊止工長一千四百五十四丈六尺又王家莊引河口攔河南壩一道長一十四丈三尺又芒稻河西土嶺長八十丈三尺東土嶺長八十九丈又東土山下挑斜甬一段長十丈又金灣閘下自李家渡迤南起由孔家渡至新橋止長二千二百九十三丈通共估用土方銀三萬六千七百九十五兩一錢零等因前來查先經該督將人字河自金灣閘至孔家渡宜開廣濶芒稻河有土嶺二處應盡行挖去鳳凰橋引河宜加挑深通等因具題經九卿會議覆准行文在案

今既經該督估計具題應行該督速行挑濬修築工完覈減造冊題銷可也康熙三十九年十二月十三日題本月

十五日奉

旨依議欽此欽遵移咨到臣准此隨經備行該道速行挑濬修築完工覈減造冊詳銷去後今據淮揚道叅議王謙詳據江防同知張琳原任揚捕同知馬驥造冊詳銷前來相應照造轉詳伏候覈銷等因冊詳到臣據此該臣看得加挑鳳凰橋人字河芒稻河各引河及壩工經臣具

題估計部覆速行挑濬脩築工完覈減造冊題銷等因轉行

在案今據淮揚道恭議王謙詳稱加挑鳳凰橋引河并築
王家莊壩工實用銀一萬九千五百三十七兩五分四釐
六毫節省銀九百二十六兩三錢四分七釐八毫又挑芒
稻河東西土嶺并人字河實用銀一萬五千七百三十一
兩七錢一分三釐一毫五絲九忽一微節省銀六百兩三
分六釐八毫四絲九微造冊詳送前來臣覆覈無異除原
冊送部查覈外相應具

題伏乞

皇上勅部覈銷施行等因康熙四十年四月初七日題本月二

十四日奉

旨着察覈該部知道欽此欽遵於四月二十五日抄出到部該
臣等議得河道總督張鵬翮疏稱加挑鳳凰橋人字芒稻
各引河及壩工共用過銀三萬五千二百六十八兩七錢
六分零節省銀一千五百二十六兩三錢八分零據冊稱
挑河泥土堅硬運土維艱每土一方用銀一錢一分以至
一錢五分及一錢九分零不等因前來應將用過銀三
萬五千二百六十八兩七錢六分零准其開銷節省銀一
千五百二十六兩三錢八分零貯庫為河工之用可也康

熙四十年五月十八日題本月二十日奉

旨依議

兵部尚書兼都察院右都御史總督河道提督軍務臣張鵬翮謹
題為

題明事康熙三十九年四月初三日准工部咨前事都水清
吏司案呈奉本部送工科抄出該本部覆署理河道總督
印務府尹徐廷璽等題前事等因康熙三十九年正月二
十六日題二月十二日奉

旨該部知道欽此欽遵於二月十三日抄出到部該臣等議得
署理河道總督印務府尹徐廷璽等疏稱爛泥淺新開引
河疏濬深通帥家莊裴家場引河一并督催完竣於正月

二十一日開放湖水由各引河暢流入運水勢見有六七
八九尺不等重運糧船俱可通行改挑中河於正月十九
日完工開放以濟運行再高郵九里漫口臣發帑委令李
世彥等辦料募夫於本年正月初六日開工進埽二十五
日可以閉合龍門至於邵伯決口見在辦料堵塞西岨堤
河委員挑築等因前來查爛泥淺等處挑挖引河并改挑
中河既稱完工應令該督將用過銀兩覈明題銷至高郵
九里漫缺先經該督題請動帑堵築工完之日於應賠官
員名下照數追補還項等因經九卿會議覆准在案今

稱發帑委員辦料進埽於二十五日可以閉合龍門等語
應於工完之日將用過錢糧數目題報一面於應賠官員
名下照依定例追還原項其邵伯決口先經該督以見在
水深難以挑築應挑月河等因具題臣部覆令動帑挑築
在案今邵伯決口該督等既稱興工應令速照定例賠脩
堵塞完工題報可也康熙三十九年三月初二日題本月
初十日奉

旨依議欽此欽遵抄出到部擬合就行為此合咨前去查照本
部覆奉

旨內事理欽遵施行等因准此案查康熙三十九年二月十四日准工部咨為敬陳兩河堤岸脩治情形仰祈

睿鑒事都水清吏司案呈奉本部送工科抄出該本部覆署理河道總督印務府尹徐廷璽題前事等因康熙三十八年十二月二十二日題三十九年正月二十一日奉

旨工部議奏欽此欽遵於正月二十二日抄出到部該臣等議得先經河道總督于成龍疏稱邵伯更樓決口堤下原係舊涵洞堤內原有河形臣等親詣斟酌若興工堵塞需銀甚多不若就此決口之下將舊引河疏挑寬深在於河東

築做土堤束水入江可洩運河驟漲之水以固東西兩岸
堤根等因經九卿議覆准行在案今據署理河道總督印
務府尹徐廷璽會同總河于成龍疏稱決口迤東被水衝
久河底太深難以築堤今新運在即將決口西岸繞挑月
河築堤打壩使水由月河改行而見在之決口自必挂口
不特省費亦可濟目下運道之急共估銀四萬三千六百
三十八兩零見今發帑委員照估備挑等因前來查該督
等既稱卹伯更樓決口迤東被水衝久河底太深難以築
堤今新運在即將決口西岸繞挑月河築堤打壩使水由

月河改行不特省費亦可濟目下運道之急見今發帑委
員照估備挑等語應如所題速行挑築所需工料銀兩工
完之日嚴加覈減造冊題銷可也康熙三十九年正月二
十四日題本月二十六日奉

旨依議欽此欽遵抄出到部擬合就行為此合咨前去查照本
部題覆奉

旨內事理欽遵施行等因在案該臣看得仰伯更樓決口先經
署理河道總督印務府尹徐廷璽等疏稱決口連東被水
衝久河底太深難以築堤將決口西岸繞挑月河築堤打

壩使水由月河改行見在之決口自必挂口估銀四萬三千六百餘兩發帑委員照估價挑已經部議應如所題速行挑築所需工料錢糧嚴加覈減造冊題銷等因遵行在案今又准工部議覆徐廷璽

題明事疏內邵伯決口該督既稱興工應令速照定例賠修堵塞完工題報等因移咨到臣查邵伯更樓決口臣奉命親往勘閱見西岫所挑月河半被湖水淹沒南壩築而復衝水勢仍由決口旁洩急溜洶湧糧艘不能由月河而行只得由湖前進臣以糧艘關係緊要委署淮揚道同知馬驥

督催作速堵築尅期竣工今據報稱從前錢糧未經領足
工程尚餘七丈未合龍門糧船可行急請找發錢糧辦料
堵塞完工前來今奉部文責令賠脩各官一時不能設措
恐致貽誤相應循照堵塞時家馬頭并高郵九里決口之
例仍先發帑銀速行辦料堵塞俟工完之日用過錢糧照
例責令賠補還項庶急工不致貽誤矣臣謹具疏

題明伏乞

皇上睿鑒勅部速議施行等因康熙三十九年四月二十六日

題五月十二日奉

旨工部速議具奏欽此欽遵於五月十三日抄出到部該臣等
議得先經署理河道總督卬務府尹徐廷璽等疏稱卬伯
決口見在辦料堵塞等因臣部覆令速行照例賠脩堵塞
完工去後今據河道總督張鵬翔疏稱卬伯更樓決口若
照部文責令賠脩各官一時不能設措恐致貽誤相應循
照堵塞時家馬頭并高郵九里決口之例先發帑銀速行
辦料堵塞俟工完之日用過錢糧照例責令賠補還項等
因前來查卬伯更樓決口關係漕運要道今該督既稱若
責令賠修各官一時不能設措恐致貽誤應循照堵塞時

家馬頭等工之例先發帑銀辦料堵塞等語應如所題准
其先動帑銀辦料堵塞於工完之日將用過銀兩題報一
面於應賠官員名下勒追還項可也康熙三十九年五月
十四日題本月十五日奉

旨依議速行

兵部尚書兼都察院右都御史總督河道提督軍務臣張鵬翔謹
題為恭報微臣勘過河工情形事臣奉

命視河三月十九日到通州看石壩因其卑薄沙築水長可虞
交與分司王作舟加謹保固四月初二日自濟寧上任後
乘舟南下山東一帶運河堤岸開座俱皆完固河道並無
淺阻其北直挑淺夫銀兩與倉場相近者交與總督與巡
撫相近者交與該撫各就便清查初五日由新改中河開
兩岸堤岸卑薄不堪詢之河官僉云堤工例係堤外臨河
坦坡堤內平地陡坡蓋以坦坡可禦風浪之故今新改中

河將北岸子堤改為南岸子堤且兩岸狹窄不能容水其
清河子堤地居下流兩岸皆水况係虛鬆沙土難抵風浪
內外衝激甚屬危險飭行原修各官將卑薄虛鬆及殘缺
塌卸者加幫高厚夯碾堅實一律完竣如有違抗另疏查
叅初六初七等日由清江浦至淮安寶應高郵江都等處
查看土堤及排椿工程俱有塌卸殘缺卑矮單薄不堪之
處其西堤自江都縣東西灣起至高郵橫軍樓止被湖水
淹沒一望汪洋具永安界首等處石堤修砌十不及一二
見在嚴飭經手各官上緊修築堅固速行竣工如有抗違

另疏查恭嵇家關決口尚未堵塞查原係減壩邵伯南壩
既堵應留此口宣洩以保堤工四月十七日至黃河時家
馬頭決口尚未堵塞完竣飭其備築四月二十一日至海
口有運料小河一道自七區直通海口運送料物甚便惜
已淤塞見在估計挑濬四月二十九日至陶家莊其引河
范承勳等見在挑濬尚未完工五月初二日到歸仁堤臨
湖石工加灰抹縫將畢及乘舟臨湖往看尚有罅隙榛朽
之處飭其補砌滾水壩一座尚未搶築有涵洞缺口洩水
盡入洪澤湖故白洋地方可無水患若將缺口堵塞水無

去路今正在訪求出水之處另疏奏

聞初五日到高家堰自武家墩至小黃莊交界堤岸排椿塌卸
堤身衝刷臨湖石堤從前並未加砌甚屬危險臨湖釘埽
工程與部臣范承勳等公議派官速行修築石工見在委
官估計辦料修砌自小黃莊至周橋臨湖石工砌完者甚
多間有未完者見在修砌其堤工係分修五日藻等加幫
尚未全完周橋已經堵塞茆家園等六壩俱已全衝水勢
洶湧辦料相機堵塞實屬要務擬自古溝以至六壩臨湖
俱照周橋一例皆砌石工方可堅固俟堵塞六壩修滾水

石壩後另行估計修砌至於海口兩岸黃運中三河堤岸
有領帑興修者有捐工修築者多有未完即已完者亦單
薄不堪伏秋水長在在堪虞見在勒限嚴催補修堅固完
竣如抗違不完者另疏查叅五月初八日至王家營具引
河已經淤塞應仍令馮佑挑濬具邳州王家堂決口據報
已修月堤尚有舊缺口未堵飭具上緊堵塞至於盡拆欄
黃壩以疏海口挑人字河芒稻河引湖水入江開張福口
引河以濟運道均係緊急工程臣已經一面動帑興工具

疏

題明在案其餘工程有應築應疏之處容臣逐一確估次第
入

告所有微臣勘過河工情形理合具疏

題報伏乞

皇上睿鑒施行等因康熙三十九年五月初十日題六月初一

日奉

旨該部知道欽此欽遵於六月初二日抄出到部該臣等議得
河道總督張鵬瀚疏稱臣到通州看石壩卑薄沙築交分
司王作舟加謹保固新改中河堤岸卑薄不堪清江浦至

淮安寶高江等處土堤排椿工程塌卸殘缺永安界首石
堤修砌十不及一二見飭修築時家馬頭決口尚未堵塞
飭其僱築陶家莊引河范承勳等挑濬尚未完工歸仁堤
臨湖石工飭其補砌高家堰自武家墩至小黃莊堤岸排
椿塌卸堤身衝刷石堤並未加砌甚屬危險臨湖釘埭工
程派官修築石工估計辦料修砌小黃莊至周橋臨湖石
工完者甚多其堤係五日藻等加幫尚未全完周橋已經
堵塞茆家園六壩全衝辦料相機堵塞擬自古溝以至六
壩照周橋一例砌石俟堵塞六壩另行估計王家營引河

淤塞仍令馮佑挑濬邳州王家堂決口已修月堤尚有舊
缺口未堵飭具堵塞等因前來應令總河飭令該管官將
此等各處堤岸卑薄殘缺及修築未完之處速行修築完
固時家馬頭決口速行堵塞其邳州王家堂決口先經原
任總河于成龍題報於九月二十七日堵塞合龍見在加
幫等因在案今稱舊缺口尚未堵塞係從前概報完工應
行該督將從前概報各官查明題咨可也康熙三十九年
六月初七日題本月初九日奉

旨依議

兵部尚書兼都察院右都御史總督河道提督軍務臣張鵬翮謹
題為高堰堤工亟宜修築以資捍禦事臣遵

旨看視河工於五月初五日至高家堰看得自武家墩至小黃
莊交界一帶臨湖石工從前原未加砌而排椿盡行塌卸
堤身衝刷危險可虞雖先經部臣范承勳等

題明動搶修錢糧令河臣修理俟六壩堵後一同修築但目
今伏汛屆期修築宜急而搶修錢糧不敷難以坐誤應即
委分修官將臨湖釘埽工程先行備築以禦伏秋後再將
裏面加幫等因咨商部臣范承勳等准咨履內稱速發賢

能河員著其領帑辦料修築卽作幫築案內大工等語臣等公議僉同除委員領大工帑銀修築作速完竣以資捍禦外臣謹會同部臣范承勳等合疏

題明伏乞

皇上睿鑒勅部議覆施行等因康熙三十九年五月初十日題
本月二十八日奉

旨九卿詹事科道會同議具奏欽此欽遵於五月二十八日抄出到部該臣等會議得河道總督張鵬翮等疏稱臣看視河工至高家堰看得自武家墩至小黃莊交界一帶臨

湖石工從前原未加砌排椿盡行塌卸堤身衝刷危險可
虞雖先經部臣范承勳等題明動搶修錢糧令河官修理
俟六壩堵後一同修築但目今伏汛屆期修築宜急而搶
修錢糧不敷難以坐誤應即委分修官將臨湖釘埽工程
先行備築以禦伏秋後再將裏面加幫等因咨商部臣范
承勳等准咨覆內稱速撥賢能河員著其領幫辦料修築
即作幫築案內大工等語臣等公議除委員領大工幫銀
修築作速完竣以資捍禦外臣謹合疏題明等因前來查
該督等既稱目今伏汛屆期修築宜急而搶修錢糧不敷

應將臨湖釘埽工程責令河員動大工錢糧備築等語應
均如所題速行脩築可也康熙三十九年六月初一日題
本月初三日奉

旨依議

兵部尚書兼都察院右都御史總督河道提督軍務臣張鵬翮謹
奏為欽奉

上諭事康熙三十九年五月十四日接員外郎拖克拖和中書
張古禮傳奉

上諭康熙三十九年五月初六日大學士伊桑阿馬奇奉

上諭員外郎拖克拖和中書張古禮著馳驛前往河道總督張
鵬翮處將脩過河工情形閱看伊等無有專責將工程令河
道總督張鵬翮明白繕寫摺子交與伊等帶來啟奏欽此欽
遵臣謹將應脩工程一一為我

皇上陳之

一海口之運料河宜開也脩工應用蘆葦柴草等項多
產海濱黃河轉運維艱舊有運料小河一道自清江
浦起至海口止年久淤塞今應加挑濬深通便於運
料於河工大有所裨益

一六壩之宜閉也逼清水出口以合黃入海其關鍵全
在六壩而六壩之最要者尤在夏家橋一壩以全湖
水勢趨此故也今夏水方盛若急於堵塞一則高堰
堤岸危險可虞一則湖水洶湧恐旋塞旋衝糜費金

錢可惜目前正湏備料俟水落堵塞底為萬全之計
一高堰滾水壩宜脩也高堰容納七十二處山河之水
古人設壩原以洩異漲之水非以洩平槽之水也今
冬六壩閉後來年桃汛黃淮並漲宣洩湖水非壩不
可臣按南河志云武家墩高良澗周家橋古溝俱設
有閘又河防一覽云程家壩地亢為天然滾水壩今
周家橋高良澗等閘俱已堵塞臣親至程家壩見湖
形漸淤水勢不由此出是古今變遷不一程家壩亦
非出水之處也前河臣于成龍等相度地勢將六壩

改為四滾水壩臣覆加相度地勢相去不遠併為三
滾水壩亦屬妥協今宜備辦石料脩建於壩下就原
有之草字河唐漕河開為引河并築順水堤則民間
田廬無淹沒之虞

一武家墩至小黃莊之石工宜加砌也查此一帶臨湖
舊有石工僅出水面二三尺不等必須加砌使高與
小黃莊見脩石工一律齊高正在確估工料興脩並
查覈從前領銀不脩情弊另疏

一古溝至六壩之石工宜脩也臣查臨湖石工至古溝而止自此迤下俱係土堤每年歲脩搶脩糜費錢糧似宜脩砌石堤在目前用帑雖多然計之數年之後可省歲脩之費宜於滾壩告成之後漸次脩舉

一運河之宜挑深也自清河縣運口至高郵州界首一帶裏河頻年黃水入運淤墊從未挑濬前河臣每以加高為事以致河身日高一遇水漲往往潰決堪虞訪之輿論宜加挑濬深通即取河底之泥以加堤身庶為有益臣前已面

奏奉

旨俞允欽遵在案俟今冬糧艘過盡即煞壩挑濬一切進
貢差使暫由陸行

一高寶江都一帶西岸土石堤工宜脩也今洪澤湖水
東下水勢方大西堤盡淹河湖一片俟冬時水落宜
估計興脩

一高郵城南之石壩宜脩也今高郵湖水洶湧經由城
南壩上而出以勢漸遠不能會入人字河而洩宜於
秋盡水落照前河臣所估將五壩改為四滾水壩辦

料興脩於壩下相度形勢開引河使水有去路

一歸仁堤臨湖石工加灰抹縫將畢臣乘舟往看尚有
罅隙椿朽之處飭其補砌滾水壩一座尚未脩築有
涵洞缺口洩水盡入洪澤湖故白洋地方可無水患
若將缺口堵塞水無去路今正在訪求出水之處另
疏奏

聞

一運口以至濱海一帶兩岸堤工亟應加幫也攔黃壩
已經拆去海口已經疏通馬家港已經堵塞時家馬

頭飭令速堵完竣轉圻糧船過完運口築堤堵截使
黃水盡皆下注入海涓滴不令旁溢正值伏汛屆臨
水勢必較往年甚大山清安東黃河兩岸堤工必須
加幫高厚以資捍禦但此堤工有前經動帑加幫者
有撥捐工人員脩築者俱未奏銷俟奏銷之後方行
加幫恐致遲誤現在飭令該管道廳確查山清安三
邑堤工原高寬丈尺若干領帑幫過若干捐工幫過
若干今仍應再幫高寬若干一面查明造冊具

題一面發帑委員加幫庶不致貽誤

一王家營引河宜挑也此河原令馮佑挑挖贖罪今已淤墊飭令馮佑作速挑挖深通准其贖罪如不成河不准贖罪

一新改中河堤岸宜脩也兩岸堤工單薄不堪水漲可虞臣查新築堤長一萬七百五十八丈候選州同馬勳等三百五十員領帑承脩內項衝刷灣處估釘排椿二千八百三十四丈桃源縣知縣王珮等十八員領帑承脩迄今並未完工除飭令各官上緊照估脩築勒限完固如再抗違另疏查叅追帑仍治以誤工

之罪臣看新挑中河窄狹不如舊中河之寬深足以容水俟糧船過完於深秋水涸之時臣再率河官復加查勘若舊中河可以脩堤仍由舊中河行運如果不能築堤再將新中河審度形勢另疏奏

聞

一王家營之減水壩宜開也查前河臣靳輔於此脩減水大壩以洩黃河漫溢之水以免王家營民房淹沒後經于成龍築堤堵塞過黃河大漲漫溢之水無處宣洩淹及王家營今臣親往查勘居民咸請開壩洩

水臣審度形勢應動帑酌開十餘丈兩頭下埽裏住洩黃漲漫溢之水由鹽河而出

一桃源縣黃河南岸堤工宜加幫也臣親看近長湖一帶土堤長四千二百餘丈卑薄不堪兩面受水在在堪虞應動帑加幫高厚以資捍禦

一駱馬湖口竹絡壩宜築也此口坐落宿遷縣黃河北岸與駱馬湖口正對原築有竹絡壩一座長五十五丈節宣黃湖大漲之水今看得黃河身高自去歲水漲漫缺二段共七丈黃水反流入駱馬湖口匯入中

流亟宜堵築以禦黃水無致淤墊中河俟此口堵後
使黃水不得內灌中河然後酌量將中河頭煞壩堵
塞引駱馬湖水由舊中河進石閘入黃河助黃刷沙
如遇黃水大漲恐其倒灌則閉閘以禦之伏秋二汛
派該管縣丞胡徵堪住宿閘上不分晝夜風雨防守
查此閘係原任知州李經邦承脩因金門下窄上寬
不能下板到底應飭令李經邦改脩金門合式挑挖
引河深通然後議堵中河引水入黃

一王家堂之缺口宜加築也此工坐落睢寧縣黃河南

岍地方臣親往驗看大溜頂衝最屬險要所脩月堤
浮沙堆築卑薄不堪而舊決口又與月堤逼近無庸
另脩應令該廳陳謙吉將月堤賠脩高厚作為正堤
但該廳已經告病一時難以設措恐致誤工應動歲
脩錢糧交與署事同知金玉衡作速備工脩築以禦
伏汎用過錢糧仍令陳謙吉等照例追賠還項

一徐州郭家嘴之險工宜脩也此工在黃河南岍逼近
徐城對岍河嘴挺入河心二里許以致大溜直射郭
家嘴甚屬危險城池民生關係不小應將沙嘴挑挖

引河直出俟水勢大漲資其衝刷河嘴以殺大溜水
勢郭家嘴舊有石工至北門迤西而止每年釘椿下
埽補救一時不能經久每年歲脩捨脩糜費錢糧臣
親往查看據耆民咸稱對岸石山採石甚易加砌石
工底可經久臣率河官量度自北門石工頭起至段
家莊止長六百五十餘丈加砌石工與舊石工一律
平整不惟可保城池且可省歲脩之費又蘇家山石
嘴挑出河心以致南岸韓家山一帶頂衝崩潰逼近
徐城應自楊家樓起至段家莊月堤止築月堤長四

百餘丈以作重門之障庶徐州城池得以保固無虞
一黃運中三河堤所有領帑興脩者有捐工脩築者多
有未完即已完者單薄不堪見在飭其堅固脩築勒
限五月二十九日完工如敢抗違不完另行

題叅究追此等工程實屬不堪遇伏秋水漲有衝刷塌卸之
處而承脩人員多不在工看守行文徃催緩不濟事
應責令本管河官動帑搶護用過帑銀仍於承脩人
員名下追補還項

一徐州邳州睢寧宿遷桃源清河山陽安東各州縣黃

河險工臣逐一查明應照例動支歲脩錢糧進埽防護仍飭該管河官當伏秋三汛無分晝夜風雨晝地防守務期保固謹將應脩工程繕寫摺子具

奏伏乞

皇上睿鑒施行等因康熙三十九年五月二十五日奏六月初

八日奉

旨九卿詹事科道會同速議具奏欽此該臣等會議得河道總督張鵬翮疏稱脩工應用蘆葦柴草等項多產海濱黃河轉運維艱舊有運料小河一道年久淤塞應加挑濬深通

運料等語查運料小河先經原任總河董安國於運

旨具奏事案內估計發帑挑濬在案尚未題銷今該督既稱淤
塞等語應如所奏准其挑濬仍令該督將先前曾否挑濬
之處查明具題又疏稱武家墩至小黃莊一帶臨湖舊有
石工僅出水面二三尺不等必須加砌與小黃莊見脩石
工一律齊高正在確估工料興脩並查從前領銀不脩情
弊另疏題叅等語應如所奏令其加砌從前領銀不脩各
官該督既稱另疏題叅應俟題叅到日再議又疏稱高寶
江都一帶兩岸土石堤工宜脩俟冬時水落估計興脩等

語查高寶江西岸土石堤工於會勘案内估計脩理在案
今該督既稱宜脩應准其脩理將從前估脩之處是否在
內之處查明具題又疏稱高郵城南石壩於秋盡水落照
前河臣所估將五壩改為四滾水壩辦料興脩於壩下開
引河使水有去路等語查先經原任總河于成龍將高郵
五減水壩改為滾水石壩等因具題經九卿會議行令將
需用錢糧估計具題在案應如該督所奏又疏稱桃源縣
黃河南岸堤工臣親看近長湖一帶土堤長四千二百餘
丈卑薄不堪應動帑加幫高厚以資捍禦等語查桃源縣

黃河南岸堤工於會勘案內估計加幫在案今該督既稱
此堤卑薄不堪應行加幫等語應如所奏准其加幫仍令
該督將是否在從前估脩工內之處查明具題又疏稱歸
仁堤臨湖石工尚有罅隙椿朽之處飭其補砌滾水壩一
座尚未脩築有涵洞缺口洩水盡入洪澤湖若將缺口堵
塞水無去路今正在訪求出水之處另疏奏

聞新改中河兩岸堤工單薄不堪臣查新築堤長一萬七百五
十八丈候選州同馬勳等領幫承脩內頂衝刷灣處估釘
排椿二千八百三十四丈桃源縣知縣王珮等領幫承脩

今並未完工飭令上緊脩築完固如再抗違另疏查叅新挑中河窄狹不如舊中河之寬深足以容水俟糧船過完於深秋水涸之時臣再率河官查勘若舊中河可以脩堤仍由舊中河行運如果不能築堤將新中河審度形勢另疏奏

聞等語均應俟具題之日再議又疏稱古溝至六壩俱係土堤每年歲脩搶脩糜費錢糧似宜脩砌石堤可省歲搶之費於深壩告成之後漸次脩舉等語查先經左副都御史王紳條奏周橋以南土堤應盡改石工經九卿會議覆令總

河張鵬翔會同尚書范承勳等定議具題到日再議等因
在案今該督既稱此堤脩砌石工可省歲捨之費等語應
如所奏脩砌石工又疏稱逼清水出口以會黃入海全在
六壩而六壩之最要者尤在夏家橋一壩以全湖水勢趨
此故也今夏水方盛若急於堵塞恐旋塞旋衝俟水落堵
塞高堰減水壩前河臣于成龍等將六壩改為四滾水壩
臣復加相度地勢相去不遠并為三滾水壩於壩下就原
有之草字河唐漕河開為引河并築順水堤清河縣運口
至高郵州界首一帶運河頻年黃水入運淤墊從未挑濬

以致河身日高宜加挑濬深通臣前已面奏奉

旨俞允欽遵在案俟今冬糧船過盡即煞壩挑濬一切進

貢差使暫由陸行運口以至濱海一帶兩岸堤工亟應加幫

攔黃壩已經拆去海口已經疏通馬家港已經堵塞時家

馬頭飭令速堵完竣黃水盡皆下注入海涓滴不令旁溢

伏汛屆臨水勢必較往年甚大兩岸堤工必須加幫高寬

但此堤工有前經動幫加幫者有撥捐工人員脩築者俱

未奏銷若俟奏銷之後方行加幫恐致遲誤見在飭令該

管道廳確查山清安三邑堤工原高寬丈尺若干領幫幫

過若干捐工幫過若干今仍應再加幫高寬若干一面查明造冊具題一面發幫委員加幫前河臣靳輔於王家營脩減水大壩以洩黃河漫溢之水以免王家營民房淹沒後經于成龍築堤堵塞過黃河大漲無處宣洩淹及王家營今應動帑酌開十餘丈兩頭下埽裹住洩黃漲漫溢之水由鹽河而出王家營引河原令馮佑挑挖贖罪今已淤墊飭馮佑作速挑挖深通准其贖罪如不成河不准贖罪駱馬湖口正對原築有竹絡壩一座長五十五丈節宣黃湖大漲之水今黃河身高自去歲水流漫缺二段共七丈

黃水反流入駱馬湖口會入中河亟宜堵築以禦黃水無
致淤墊中河俟此口堵後然後將中河頭煞壩堵塞引駱
馬湖水由舊中河進石閘入黃河助黃刷沙如遇黃水大
漲恐其倒灌則閉閘以禦之此閘係原任知州李經邦采
脩因金門下窄上寬不能下板到底應飭令李經邦改脩
金門合式挑挖引河深通然後議堵中河引水入黃王家
堂缺口坐落睢寧縣黃河南岍地方大溜頂衝最屬險要
所脩月堤浮沙堆築卑薄不堪而舊決口又與月堤逼近
無容另脩應令該廳陳謙吉將月堤賠脩高厚作為正堤

但該廳已經告病一時難以設措恐致誤工應動歲脩錢糧交與署事同知金玉衡作速償工脩築以禦伏汎用過錢糧仍令陳謙吉等照例追賠還項徐城對岸沙嘴挺入河心二里許以致大溜直射郭家嘴甚屬危險應將沙嘴挑挖引河俟水勢大漲資其衝刷河嘴以殺大溜水勢郭家嘴舊有石工至北門迤西而止每年釘椿下埽補救一時不能經久加砌石工庶可經久臣率河官量度自北門石工頭起至段家莊止長六百五十餘丈加砌石工與舊石工一律平整不惟可保城池且可省歲搶之費又蘇家

山石皆挑出河心以致南岸韓家山一帶頂衝崩潰逼近
徐城應自楊家樓起至段家莊月堤止築月堤長四百餘
丈以作重門之障黃運中三河堤岸有領帑興脩者有捐
工脩築者多有未完即已完者單簿不堪見在飭其堅固
脩築勒限五月二十九日完工此等工程實屬不堪過伏
秋水漲有衝刷塌卸之處而承脩人員多不在工看守行
文往催緩不濟事應責令本管河官動帑搶護用過帑銀
仍於承脩人員名下追補還項徐州邳州睢寧宿遷桃源
清河山陽安東各州縣黃河險工臣逐一查明照例動支

歲脩錢糧進埽防護仍飭該管官當伏秋二汛晝夜防守
務期保固等語應均如所奏一面與工一面將需用銀兩
確估具題可也康熙三十九年六月十三日題本月十五
日奉

旨依議速行